



Achan qui auoit emporté du pillage interdit ; ayant esté lapidé, la ville de Hay est subjuguée & déconfite par Iosué.

O S V E' pria le Seigneur leur estre fauorable au voyage par eux entrepris & pour sonder les forces & moyens de ceux de la ville de Hay, il enuoya des espions qui rapportèrent qu'il ne falloit que peu d'hommes pour emporter cette ville. Suiuant cet aduis il n'y enuoya que trois mille combatans, qui furent contraints tourner le dos pour la resistance des citoyens, dont Iosué se prosterna deuant le Seigneur, disant : Helas ! pourquoy as-tu fait passer ce peuple outre le Iourdain, pour nous liurer és mains des Amorrhéens ? Mais le Seigneur le conforta, & dist, Israël a peché. Et lors Iosué pour trouuer le pecheur, fit discussion des lignées, & trouua le larron Achan, qui confessa auoir dérobé des choses interdites, & auoir caché le tout en son pauillon : Lequel Achan fut lapidé, & son larcin réduit en cendres, dont le Seigneur fut appaisé. Et lors Iosué fit derechef assaillir la ville de Hay, dont les citoyens esperans emporter la victoire, firent vne sortie sur Israël ; mais les gens mis en embuscade par Iosué, ayans veu son signal en leuant son escussion, vindrent enclorre ceux qui estoient fortis de Hay, & prindrent la ville, & la bruslerent, & firent pendre le Roy qui leur resistoit. Iosué donc ayant eu cette victoire, loüa le Seigneur, & fit lire toute la Loy que Moyse auoit baillée, ensemble les benedictions & maledictions contenuës en icelle.